

Jesus in die Ou Testament

"Wie het na die hemel opgeklim en neergedaal? Wie het die wind in sy vuiste versamel? Wie het die waters in 'n kleed saamgebind? Wie het al die eindes van die aarde vasgestel? Hoe is sy Naam? En hoe is die Naam van sy Seun—as jy dit weet?" - Spreuke 30:4.

Wanneer ons lees dat Jesus wel bestaan het alvorens die grondlegging van die wêreld -Johannes 17:24, Effesiërs 1:3-6, 1 Petrus 1:19-20, 1 Johannes 1:1- dan word die opeenvolgende vraag gevra: maar waar was Hy in die Ou Testament? Hebreërs 13:8 sê tog: "Jesus Christus is gister en vandag dieselfde en tot in ewigheid." Die antwoord is: Hy kan oral gevind word in die Ou Testament! Alhoewel Sy Naam nie uitgeskryf is nie, kan ons vir Christus in aksie sien van die grondlegging van die wêreld af.

Deur teëbeelde, prototipes, metafore, gelykenisse, soms geheimenisse en twee geleenthede waar Hy weier om sy Naam te gee :-) (Genesis 32:29, Rigters 13:18) kan ons 'n ware skat van Christuskennis vind. Omdat die Ou verbond in Christus vervul is - Matteus 5:17, Lukas 24:44- vra dit ons om die Ou Testament op so 'n wyse te lees waarop die vervulling duidelik erken kan word. Kom ons gaan kyk dan na Ou Testamentiese gebeurtenisse en soek vir Jesus!

"Ek wil dan opstaan en in die stad rondgaan, in die strate en op die pleine wil ek na my sielsbeminde soek ..." -Hooglied 3:2.

Jesus Christus, die Woord van God

Die heel eerste verwysing na Jesus word in die heel eerste vers van die Bybel gevind. Genesis 1:1 - "In die begin het God die hemel en die aarde geskape."

Kolossense 1:15-17 - "Hy is die Beeld van die onsienlike God, die Eersgeborene van die hele skepping; want in Hom is alle dinge geskape wat in die hemele en op die aarde is, wat sienlik en onsienlik is, trone sowel as heerskappye en owerhede en magte--alle dinge is deur Hom en tot Hom geskape. En Hy is voor alle dinge, en in Hom hou alle dinge stand."

In Johannes 1 lees ons die monumentale openbaring dat Jesus die Woord van God is terwyl Hebreërs 11:3 sê: "Deur die geloof verstaan ons dat die wêreld deur die woord van God toeberei is, sodat die dinge wat gesien word, nie ontstaan het uit sienlike dinge nie."

Voordat ek aangaan, kom ons lees eers die volgende:

1 Samuel 3:21 - "die HERE het Hom geopenbaar ... deur die woord van die HERE."

Jeremia 1:1-2 - "Die woorde van Jeremia ... tot wie die Woord van die Here gekom het..."

Esegiël 1:3 - "het die woord van die HERE uitdruklik gekom tot Esegiël..."

Hoséa 1:1 - "Die woord van die HERE wat gekom het tot Hoséa..."

Joël 1:1 - "Die woord van die HERE wat tot Joël, die seun van Pétuel, gekom het..."

Jona 1:1 - "En die woord van die HERE het gekom tot Jona..."

Dus, wanneer die Woord van die Here na jou toe kom, is dit Christus wat na jou toe kom! Vir die Bruid gee dit 'n sterker klem op die absolute noodsaaklikheid om na die stem van die Here te luister. As Jesus Deuteronomium 8:3 aanhaal in Mattheus 4 en sê "dat die mens nie van brood alleen lewe nie, maar dat die mens lewe van alles wat uit die mond van die HERE uitgaan" dan word dit nog verder beklemtoon en verwys Hy ook na Homself.

Die krag van die Woord word verder uitgewys in Genesis:

Genesis 1:3 - "En God het gesê: Laat daar lig wees! En daar was lig."

Genesis 1:6 - "En God het gesê: Laat daar 'n uitspannel wees..."

En so in die skeppingsweek bring die Here alles tot standkoming deur wat Hy spreek, deur Jesus. Dit is dan wonderlik om Psalms 119 te lees wat die langste Psalm en hoofstuk in die hele Bybel is, waar elke lieve vers betrekking het tot die Woord van God.

Psalms 119:9 - "Waarmee sal die jongeling sy pad suiwer hou? Deur dit te hou na u woord."

Psalms 56:11 - "Deur God sal ek die woord prys; deur die HERE sal ek die woord prys."

Spreuke 13:13 - "Wie die Woord verag, moet dit ontgelde; maar hy wat die gebod vrees, ontvang vergelding."

Spreuke 16:20 - "Wie ag gee op die Woord, sal die goeie vind; en hy wat op die HERE vertrou, is gelukkig."

Jesaja 55:10-11 - "Want soos die reën en die sneeu van die hemel neerdaal en daarheen nie terugkeer nie, maar die aarde deurvogtig en maak dat dit voortbring en uitspruit en saad gee aan die saaiër en brood aan die eter; so sal my woord wees wat uit my mond uitgaan: dit sal nie leeg na My terugkeer nie, maar doen wat My behaag en voorspoedig wees in alles waartoe Ek dit stuur."

Psalms 119:105 - "U woord is 'n lamp vir my voet en 'n lig vir my pad."

Jeremia 23:29 - "Is my woord nie só, soos 'n vuur, spreek die HERE, en soos 'n hamer wat 'n rots vermorsel nie?"

Jesus Christus, die Wysheid van God

1 Korintiërs 1:24 - "...Christus, die krag van God en die wysheid van God."

Wat 'n wonderlike openbaring! Christus, die wysheid van God. Met hierdie woorde in gedagte kom ons lees die volgende:

Spreuke 1:20-22 - "Die Wysheid roep hardop daarbuite, sy verhef haar stem op die pleine, op die hoek van die rumoerige strate roep sy, by die ingange van die poorte, in die stad, spreek sy haar woorde: Hoe lank sal julle, eenvoudiges, die eenvoudigheid liefhê en die spotters lus hê om te spot en die dwase kennis haat? Wend julle tot my teregwysing, dan laat ek my gees vir julle uitstroom, wil ek my woorde aan julle bekend maak."

Dit is interessant dat wysheid hier as vroulik voorgelou word.

Spreuke 3:13-20 - "Gelukkig die mens wat wysheid gevind het, en die mens wat verstand verkry; want die verkryging daarvan is beter as dié van silwer, en die verwerwing daarvan beter as van goud; dit is kosteliker as korale, en al jou kleinode kan daar nie mee vergelyk word nie. In sy regterhand is lengte van dae, in sy linkerhand rykdom en eer; sy weë is lieflike weë, en al sy paaie is vrede. Dit is 'n lewensboom vir die wat dit aangryp, en elkeen wat dit vashou, is gelukkig. Die HERE het deur wysheid die aarde gegrond, deur verstand die hemele vasgestel; deur sy kennis het die watervloede oopgebreek en het die wolke dou gedrup."

Spreuke 4:7-9 - "Die beginsel van die wysheid is: Verwerp wysheid en verwerp insig deur al wat jy besit. Hou dit hoog, dan sal dit jou verhoog; dit sal jou eer as jy dit omhels. Dit sal 'n lieflike krans gee vir jou hoof, dit sal jou 'n sierlike kroon verskaf."

Spreuke 7:4-5 - "Sê aan die wysheid: Jy is my suster! en noem die verstand jou vertroueling, sodat hulle jou kan bewaar vir die vreemde vrou, vir die ontugtige wat met haar woorde vlei."

In die volgende gedeelte nooi Jesus ons vir die eerste keer om nagmaal te hou:
Spreuke 9:1-6 - "Die Wysheid het haar huis gebou, haar sewe pilare uitgekap, haar slagvee geslag, haar wyn gemeng, ook haar tafel gedek. Sy het haar diensmeisies uitgestuur, sy nooi uit op die hange van die stadshoogtes: Wie eenvoudig is, laat hy inkom hierheen, wie verstandeloos is, vir hom sê sy: Kom, eet julle van my brood, en drink van die wyn wat ek gemeng het; laat staan die eenvoudigheid, dan sal julle lewe, en betree die weg van verstand."

Vir 'n hoendervleis op jou hoendervleiservaring, lees saam met my die hoogtepunt van Christus se Ou Testamentiese toesprake tot ons:

Spreuke 8:1-36 - "Roep die Wysheid nie, en verhef die Verstandigheid nie haar stem nie? Op die top van die hoogtes langs die weg, op die kruispunt van die paaie staan sy, aan die kant van die poorte by die uitgang van die stad, by die ingang van die deure roep sy hardop: Ek roep na julle, manne, en my stem is tot die mensekinders. Leer tog skrandigheid verstaan, eenvoudiges, en dwase, leer verstandigheid verstaan. Hoor, want ek sal voortreflike dinge spreek, en my lippe gaan oop vir wat reg is. Want my verhemelte spreek waarheid, en goddeloosheid is vir my lippe 'n gruwel. Al die woorde van my mond is reg, daarin is niks wat slinks of vals is nie, hulle is almal duidelik vir die verstandige en reg vir die wat kennis gevind het. Neem my tug aan, en nie silwer nie, en kennis liewer as uitgesoekte goud. Want wysheid is beter as korale, en al die kleinode kan daar nie mee vergelyk word nie. Ek, Wysheid, is vertrou met die skrandigheid, en ek vind kennis van regte oorleg. Die vrees van die HERE is om te haat wat sleg is; hoogmoed en trotsheid en 'n slegte wandel en 'n huigelagtige mond haat ek. Raad en beleid is myne, ek is die insig, sterkte is myne. Deur my regeer die konings en stel die maghebbers vas wat reg is; deur my heers die vorste en die edeles, al die regters van

die aarde. Ék het lief die wat my liefhet, en die wat my soek, sal my vind. Rykdom en eer is by my, duursame goed en geregtigheid. My vrug is beter as goud en as fyn goud, en my oprings as uitgesoekte silwer. Ek wandel op die weg van geregtigheid, in die middel van die paaie van reg, om die wat my liefhet, 'n besitting te laat erwe, en hulle skatkamers maak ek vol. Die HERE het my berei as eersteling van sy weg, voor sy werke, van ouds af. Van ewigheid af is ek geformeer, van die begin af, van die voortyd van die aarde af. Toe daar nog geen wêreldvloede was nie, is ek gebore; toe fonteine, swaar van water, nog nie daar was nie; voordat die berge ingesink het, voor die heuwels is ek gebore; toe Hy die aarde en die velde en al die stoffies van die wêreld nog nie gemaak het nie. Toe Hy die hemele berei het, was ek daar; toe Hy 'n kring afgetrek het op die oppervlakte van die wêreldvloed; toe Hy die wolke daarbo bevestig het, toe die bronne van die wêreldvloed sterk geword het; toe Hy vir die see sy grens gestel het, dat die waters sy bevel nie sou oortree nie; toe Hy die fundamente van die aarde vasgelê het— toe was ek 'n kunstenaar naas Hom, en ek was dag vir dag vol verlustiging en het gespeel voor sy aangesig altyd, en het gespeel op sy wêreldrond, en my verlustiging was met die mensekinders. Luister dan nou na my, seuns; want gelukkig is hulle wat my weë bewaar. Luister na tug en word wys, en verwerp dit nie. Gelukkig is die mens wat na my luister, om dag vir dag te waak aan my deure, by die syposte van my poorte die wag te hou. Want hy wat my vind, het die lewe gevind en verkry 'n welbehag van die HERE. Maar hy wat my mis, benadeel sy eie lewe; almal wat my haat, het die dood lief."

Kolossense 2:2-3 - "...om die verborgenheid te leer ken van God en die Vader en van Christus, in wie al die skatte van wysheid en kennis verborge is."

Jakobus 1:5 - "En as iemand van julle wysheid kortkom, laat hom dit van God bid, wat aan almal eenvoudig gee sonder om te verwyf, en dit sal aan hom gegee word."

Jakobus 3:17 - "Maar die wysheid van bo is ten eerste rein, dan vredeliewend, vriendelik, geseglik, vol barmhartigheid en goeie vrugte, onpartydig en ongeveins."

Prediker 7:12 - "Want wysheid is 'n beskutting, geld is 'n beskutting; maar die voordeel van kennis is: die wysheid hou die besitter daarvan in die lewe."

Jesus Christus, die Lig van die Lewe

Prediker 11:7 - "Verder, soet is die lig..."

Job 38:19 - "Waar is tog die weg na die woning van die lig?"

Ek deel graag die volgende self-sprekende verse:

Johannes 8:12 - "Ek is die lig van die wêreld; wie My volg, sal sekerlik nie in die duisternis wandel nie, maar sal die lig van die lewe hê."

Johannes 1:4-5 - "In Hom was lewe, en die lewe was die lig van die mense. En die lig skyn in die duisternis, en die duisternis het dit nie oorweldig nie."

1 Johannes 1:5 - "God is lig, en geen duisternis is in Hom nie."

Jesaja 9:1 - "Die volk wat in duisternis wandel, het 'n groot lig gesien; die wat woon in die land van die doodskaduwee, oor hulle het 'n lig geskyn."

Job 33:28 - "Kyk, dit alles doen God, twee keer, ja, drie keer met 'n mens om sy siel terug te bring van die kuil, sodat hy bestraal word met die lig van die lewe.

Jesaja 51:4 - "Luister na My, my volk, en neig die oor tot My, my nasie! Want 'n wet sal van My uitgaan, en Ek sal my reg vasstel as 'n lig van die volke."

Psalms 27:1 - "Die HERE is my lig en my heil..."

Psalms 36:10 - "...in u lig sien ons die lig."

Psalms 43:3 - "Stuur u lig en u waarheid; laat dié my lei; laat dié my bring na u heilige berg en na u woninge"

Psalms 56:13 - "om te wandel voor die aangesig van God in die lig van die lewe."

Psalms 119:105 - "U woord is 'n lamp vir my voet en 'n lig vir my pad."

Psalms 119:130 - "Die opening van u woorde gee lig..."

Prediker 2:13 - "Wel het ek gesien dat die wysheid die voorkeur het bo die dwaasheid soos die lig die voorkeur het bo die duisternis."

Jesaja 42:6-7 - "Ek, die HERE, het U geroep in geregtigheid, en Ek vat u hand en behoed U en gee U as 'n verbond van die volk, as 'n lig van die nasies, om blinde oë te open; om gevangenes uit die kerker uit te lei, uit die gevangenis diegene wat in die duisternis sit."

Jesaja 49:6 - "Ek het U gemaak tot 'n lig van die nasies, om my heil te wees tot aan die einde van die aarde."

Jesaja 10:17 - "En die Lig van Israel sal 'n vuur wees, en sy Heilige 'n vlam; en dit sal sy distels en sy dorings verbrand en verteer op een dag."

Jesus Christus, die Weg van die Here

Johannes 14:6 - "Jesus antwoord hom: Ek is die weg en die waarheid en die lewe; niemand kom na die Vader behalwe deur My nie."

Wanneer ons besef dat Jesus die enigste Ewige Weg is wat ons na die Vader toe vat, word gehoorsaamheid aan Hom eens weer uiters belangrik aangesien enige dwaling jou dan tot die dood toe sal lei. Mattheus 7:13-14 - "Gaan in deur die nou poort, want breed is die poort en wyd is die pad wat na die verderf lei, en daar is baie wat daardeur ingaan. Want die poort is nou en die pad is smal wat na die lewe lei, en daar is min wat dit vind."

In Openbaring 21 word daar gepraat van die Nuwe Jerusalem wat die Bruid van Christus is. Alhoewel hierdie stad massiewe afmetings het, is daar net een straat daarin! (Vers 21)

Psalms 18:31 - "Die weg van God is volmaak..."

Psalms 25:9 - "Hy sal die ootmoediges lei in die reg en die ootmoediges sy weg leer."

Psalms 25:12 - "Wie tog is die man wat die HERE vrees? Hy sal hom leer aangaande die weg wat hy moet kies."

Psalms 27:11 - "HERE, leer my u weg en lei my op 'n gelyk pad, vanweë my vyande."
Psalms 37:34 - "Wag op die HERE en hou sy weg, en Hy sal jou verhoog, om die aarde te besit..."

Psalms 77:14 - "o God, u weg is in heiligheid. Wie is 'n groot God soos God?"

Psalms 128:1 - "Welgeluksalig is elkeen wat die HERE vrees, wat in sy weë wandel!"

Spreuke 10:29 - "Die weg van die HERE is vir die opregte 'n vesting..."

Spreuke 23:19 - "Hoor, my seun, en word wys, en rig jou hart reguit op die weg."

Jesaja 35:8 - "En dáár sal 'n grootpad wees en 'n weg wat die heilige weg genoem sal word; geen onreine sal daarop voorttrek nie, maar vir hulle sal dit wees; wie die weg bewandel—selfs die dwase sal nie dwaal nie."

Jesaja 2:3 - "En baie volke sal heengaan en sê: Kom laat ons optrek na die berg van die HERE, na die huis van die God van Jakob, dat Hy ons sy weë kan leer en ons in sy paaie kan wandel. Want uit Sion sal die wet uitgaan en die woord van die HERE uit Jerusalem."

Toe Adam en Eva uit die tuin van Eden gejaag is a.g.v. hul ongehoorsaamheid, het die Here géruks by die ingang van die tuin gesit om dit te bewaar met vlammende swaarde sodat die mens nie sou kon terugkeer nie. Interessant genoeg, die Here het beveel dat die tempelvoorhangsel wat die Heiligste gedeelte skei van die Allerheiligste, met géruks daarop gemaak moes word -Eksodus 26:31. Die voorhangsel is dus 'n teëbeeld van dit wat ons keer om terug te gaan na die paradys, na die boom van die lewe toe. Direk nadat Jesus gekruisig was en gesterf het, lees ons "en die son is verduister; en die voorhangsel van die tempel het middeldeur geskeur." -Lukas 23:45. Hebreërs 10:19-20 sê dat die voorhangsel Jesus se vlees was! "Terwyl ons dan, broeders, vrymoedigheid het om in die heiligdom in te gaan deur die bloed van Jesus op die nuwe en lewende weg wat Hy vir ons ingewy het deur die voorhangsel heen, dit is sy vlees..." Dus, Jesus het sy vlees, die voorhangsel geskeur sodat 'n "nuwe en lewende weg" oop gebreek kan word na die paradys toe!

Jesus Christus, die Engel van die Here

Rigters 13:18 - "En die Engel van die HERE sê vir hom: Waarom vra jy dan na my naam terwyl hy wonderbaar is?"

Daar is baie verwysings na Engele in die Ou Testament, maar baie van hierdie Skrifte maak dit duidelik dat soms was dit meer as 'n Engel wat tersprake was.

Rigters 13:21-22 - "En die Engel van die HERE het verder nie meer aan Manóag en sy vrou verskyn nie. Daarop bemerk Manóag dat dit die Engel van die HERE was. En Manóag sê vir sy vrou: Ons sal sekerlik sterwe, omdat ons God gesien het."

Hierdie verwysings na Jesus is soms moeilik om te onderskei, aangesien dit nie altyd duidelik is wanneer dit 'n Engel van die Here, of *die* Engel van die Here is nie. In die volgende teks praat Jesaja van Jesus se liefde vir ons lank voor sy koms deur die maagd Maria.

Jesaja 63:9 - "In al hulle benoudheid was Hy benoud, en die Engel van sy aangesig het hulle verlos; deur sy liefde en deur sy medelyde het Hy hulle verlos; en Hy het hulle opgehef en hulle gedra, al die dae van die ou tyd."

Dan kom ons weer by die teks van die brandende bos, waar Jesus ook verskyn het in verband met die verlossing van Sy volk:

Eksodus 3:2-4 - "Daarop verskyn die Engel van die HERE aan hom in 'n vuurvlam uit 'n doringbos. En toe hy weer sien, brand die doringbos in die vuur, maar die doringbos word nie verteer nie! En Moses sê: Laat ek tog nader gaan en hierdie groot verskynsel bekijk, waarom die doringbos nie verbrand nie. Toe die HERE sien dat hy nuuskierig nader kom, roep God na hom uit die doringbos en sê: Moses, Moses! En hy antwoord: Hier is ek."

Jesus Christus, die Lam van God

Regdeur die boek van Openbaring word Jesus die Lam van God genoem. Johannes het Jesus ook dadelik herken as die Lam: Johannes 1:29 - "Die volgende dag sien Johannes Jesus na hom toe kom, en hy sê: Dáár is die Lam van God wat die sonde van die wêreld wegneem!"

Later argumenteer van die Jode met Jesus, en Hy sê vir hulle: Johannes 8:56 - "Abraham, julle vader, het hom verheug dat hy my dag sou sien; en hy het dit gesien en het hom verbly." In Genesis kry ons 'n enkele gedeelte wat verwys na wat Abraham gesien het:

Genesis 22:7-8 - "Toe spreek Isak met sy vader Abraham en sê: My vader! En hy antwoord: Hier is ek, my seun! En hy sê: Hier is die vuur en die hout, maar waar is die lam vir 'n brandoffer? En Abraham antwoord: God sal vir Homself die lam vir 'n brandoffer voorsien, my seun."

Vers 11 slaan dan 'n breër snaar: Genesis 22:11 - "Maar die Engel van die HERE het na hom van die hemel af geroep en gesê: Abraham, Abraham! En hy antwoord: Hier is ek!"

Die heel eerste fees wat die Here die Israeliete beveel het om te onderhou, die pasga, is vol simboliek wat direk wys na Jesus:

Eksodus 12:5-8 - "Julle moet 'n lam hê sonder gebrek, 'n jaaroud rammetjie. Van die skape of van die bokke kan julle dit neem. En julle moet dit in bewaring hou tot die veertiende dag van hierdie maand; en die hele vergadering van die gemeente van Israel moet dit slag teen die aand. En hulle moet van die bloed neem en dit stryk aan die twee deurposte en aan die bo-drumpel, aan die huise waarin hulle dit eet. En hulle moet die vleis in dieselfde nag eet, oor die vuur gebraai; saam met ongesuurde brode moet hulle dit met bitter kruie eet."

Vers 10: "Julle mag daar ook niks van laat oorbly tot die môre toe nie; maar wat daarvan tot die môre oorbly, moet julle met vuur verbrand."

Die Lam was sonder gebrek: 1 Petrus 1:19 "maar deur die kosbare bloed van Christus, soos van 'n lam sonder gebrek en vlekkeloos."

Die bloed van die lam was aan die deurposte gesmeer wat gedien het as 'n teken: Eksodus 12:13 - "Maar die bloed sal vir julle 'n teken wees aan die huise waarin julle is: as Ek die bloed sien, sal Ek by julle verbygaan. En daar sal geen verderflike plaag onder julle wees wanneer Ek Egipteland tref nie." In Eksodus 12:22 waar die instelling van Pasga ter sprake is, lees ons "neem 'n bossie hisop en steek dit in die bloed wat in die skottel is, en stryk aan die bodrumpel en aan die twee deurposte van die bloed wat in die skottel is." So word die bloed van Christus aan die deurposte van jou geeshuis gesmeer sodat jy ook kan sê:

Psalms 51:9 - "Ontsondig my met hisop, dat ek kan rein wees; was my, dat ek witter kan wees as sneeu."

1 Johannes 1:7 - "...die bloed van Jesus Christus, sy Seun, reinig ons van alle sonde." Op. 7:14 - "...en hulle het hul klere gewas en hul klere wit gemaak in die bloed van die Lam."

Op. 12:11 - "En hulle het hom oorwin deur die bloed van die Lam..."

Hulle mag niks van die lam laat oorbly het nie. Johannes 6:53-58 - "En Jesus sê vir hulle: Voorwaar, voorwaar Ek sê vir julle, as julle nie die vlees van die Seun van die mens eet en sy bloed drink nie, het julle geen lewe in julleself nie. Hy wat my vlees eet en my bloed drink, het die ewige lewe, en Ek sal hom opwek in die laaste dag. Want my vlees is waarlik spys, en my bloed is waarlik drank. Wie my vlees eet en my bloed drink, bly in My en Ek in hom. Soos die lewende Vader My gestuur het, en Ek deur die Vader lewe, so sal hy wat My eet, ook deur My lewe. Dít is die brood wat uit die hemel neergedaal het—nie soos julle vaders die manna geëet en gesterwe het nie; wie hierdie brood eet, sal tot in ewigheid lewe."

Wanneer 'n mens hierdie teks vir die eerste keer lees dink 'n mens "whoa, wat gaan hier aan?" en dis duidelik dat van die mense wat geluister het ook so gereageer het. Daar staan in vers 66 dat baie van Sy dissipels verder nie met Hom geloop het na hierdie woord nie. Maar in vers 63 sê Hy: "Dit is die Gees wat lewend maak, die vlees is van geen nut nie; die woorde wat Ek tot julle spreek, is gees en is lewe."

Daar is 'n groot misterie rondom bloed wat hier opgeklar is. Levitikus 17:11 sê die lewe is in die bloed (die OAV vertaal dit as die siel) terwyl die inneming van bloed sterk verbied was -Genesis 9:4, Levitikus 3:17. Maar in die nuwe verbond mag en moet die *rein* bloed van Christus ingeneem word, anderste het jy geen lewe in jou nie. Ook mag jy niks laat oorbly nie. Sela.

In Genesis word 'n prototipe van die Lam gevind, toe die Here "vir die mens en sy vrou rokke van vel gemaak en hulle dit aangetrek het" nadat hulle gesondig het -Genesis 3:21.

Handelinge 8:32 - "En die gedeelte van die Skrif wat hy besig was om te lees, was dít:

Soos 'n skaap is Hy gelei om geslag te word, en soos 'n lam wat stom is voor die een wat hom skeer, so maak Hy sy mond nie oop nie."

Openbaring 5:6 - "En ek het gesien, en kyk, in die middel van die troon en die vier lewende wesens en in die midde van die ouderlinge staan daar 'n Lam asof Hy geslag is"

Openbaring 5:12 - "Die Lam wat geslag is, is waardig om te ontvang die krag en rykdom en wysheid en sterkte en eer en heerlikheid en lof."

Jesus Christus, die Steenrots van Israel

Jesaja 30:29 - "Die lied sal by julle wees soos in die nag as die fees gevier word, en julle sal vrolik wees van hart soos die wat met die fluite loop, om te kom op die berg van die HERE, na die Steenrots van Israel."

2 Samuel 22:32 - "Want wie is God buiten die HERE, en wie 'n rots buiten onse God?"

Wanneer ons lees van die Israeliete en hoe hulle gelei was uit Egipte uit lees ons ook van die rots waaruit hulle water gekry het -Eksodus 17:6. In 1 Korintiërs 10 skryf Paulus daarvoor en sê: "want hulle het gedrink uit 'n geestelike rots wat gevolg het, en die rots was Christus." Dit is waarlik 'n vreemde beeld om in te dink maar in die lig van die skrif maak dit perfekte sin.

Johannes 4:10-14 - "Jesus antwoord en sê vir haar: As jy die gawe van God geken het en geweet het wie Hy is wat vir jou sê: Gee vir My water om te drink, sou jy Hom gevra het en Hy sou vir jou lewende water gegee het. Die vrou sê vir Hom: Here, U het nie eens 'n skepding nie, en die put is diep; waarvandaan kry U dan die lewende water? U is tog nie groter as ons vader Jakob nie, wat die put aan ons gegee het en self daaruit gedrink het, en sy seuns en sy vee? Jesus antwoord en sê vir haar: Elkeen wat van hierdie water drink, sal weer dors kry; maar elkeen wat drink van die water wat Ek hom sal gee, sal in ewigheid nooit dors kry nie, maar die water wat Ek hom sal gee, sal in hom word 'n fontein van water wat opspring tot in die ewige lewe."

Die volgende skrifte getuig dan van Christus in ons:

Psalms 36:10 - "Want by U is die fontein van die lewe; in u lig sien ons die lig."

Johannes 7:38 - "Hy wat in My glo, soos die Skrif sê: strome van lewende water sal uit sy binneste vloei."

Wanneer ons 1 Samuel 14:26-29 lees, dan word heuning voorgehou as iets wat die oë verlig, wat m.a.w. verheldering van verstand gee. Die beloofde land word ook baie die land van melk en heuning genoem. Die dringendheid om verligting van oë te verkry word deur David opgehef wanneer hy skryf: "Verlig my oë, sodat ek nie in die dood inslaap nie." -Psalms 13:4.

Tog is dit Christus wat die heuning, die verligting van oë gee!

Deuteronomium 32:13 - "...en Hy het hom heuning uit die rots laat suig..."
Psalms 81:16 - "...en met heuning uit die rots sou Ek jou versadig."

In die boek van Jesaja lees ons dat ons selfs ook uit die Rots gekap is:
Jesaja 51:1 - "Luister na My, julle wat die geregtigheid najaag, wat die HERE soek!
Aanskou die rots waaruit julle gekap is en die holte van die put waaruit julle gegrawe is."
Deuteronomium 32:18 - "Die Steenrots wat jou verwek het..."

Ons is uit die Rots uitgekap en nou is dit ons verpligting om ons geeshuis op Hom te bou:

Mattheus 7:24 - "Elkeen dan wat na hierdie woorde van My luister en dit doen, hom sal Ek vergelyk met 'n verstandige man wat sy huis op die rots gebou het."

Enige huis wat nie op die Rots gebou is nie sal val: Mattheus 7:26-27.

Psalms 9:10 - "So is die HERE dan 'n rotsvesting vir die verdrukke, 'n rotsvesting in tye van benoudheid."

Psalms 18:3 - "Die HERE is my rots en my bergvesting en my redder; my God, my rots by wie ek skuil; my skild en die horing van my heil, my rotsvesting."

Jesaja 26:4 - "Vertrou op die HERE vir ewig, want in die Here HERE is 'n ewige rots."

Deuteronomium 32:4 - "Die Rots—volkome is sy werk..."

Deuteronomium 32:31 - "Want hulle steenrots is nie soos ons Steenrots nie..."

Psalms 62:8 - "By God is my heil en my eer; die rots van my sterkte, my toevlug is in God."

In Daniël 2 sien Koning Nebukadnésar 'n visioen wat 'n profetiese vooruitskouing is van Jesus se Koninkryk. Daniël interpreteer die visioen en sê:

Daniël 2:32-35 - "Wat die beeld betref, sy hoof was van goeie goud, sy bors en sy arms van silwer, sy buik en sy lendene van koper, sy bene van yster, sy voete gedeeltelik van yster en gedeeltelik van klei. U het gekyk totdat daar sonder toedoen van mensehande 'n klip losraak wat die beeld getref het aan sy voete van yster en van klei en dit fyngestamp het. Toe is tegelykertyd die yster, die klei, die koper, die silwer en die goud fyngestamp, en dit het soos kaf geword van die dorsvloere in die somer, wat die wind wegneem, sodat daar geen spoor van gevind is nie; maar die klip wat die beeld getref het, het 'n groot rots geword wat die hele aarde vul het."

Jesus Christus, die Kosbare Hoeksteen

Jesaja 28:16 - "...so sê die Here HERE: Kyk, Ek lê in Sion 'n grondsteen, 'n beproefde steen, 'n kosbare hoeksteen wat vas gegrondves is..."

Psalms 118:22-23 - "Die steen wat die bouers verwerp het, het 'n hoeksteen geword. Dit het van die HERE gekom; dit is wonderbaar in ons oë."

Christus se identiteit as Rots en Hoeksteen hou 'n baie nou verwantenis. In die Skrif word Hy verduidelik as die hoeksteen van die gebou van God -Effesiërs 2:20, maar wanneer Christus verwerp word, word Hy 'n struikelblok vir dié persoon:

1 Petrus 2:6-8 - "Daarom staan dit ook in die Skrif: Kyk, Ek lê in Sion 'n uitverkore en kosbare hoeksteen, en die wat in Hom glo, sal nooit beskaam word nie. Vir julle dan wat glo, is Hy kosbaar; maar vir die ongelowiges geld die woord: Die steen wat die bouers verwerp het, dit het 'n hoeksteen geword; en: 'n Steen des aanstoots en 'n rots van struikeling— vir dié wat hulle daarteen stamp, omdat hulle aan die woord ongehoorsaam is, waarvoor hulle ook bestem is."

'n Streng waarskuwing word gegee oor die verwerping van die Hoeksteen:
Handelinge 4:11 - "Hy is die steen wat deur julle, die bouers, verag is, wat 'n hoeksteen geword het."
Mattheus 21:44 - "En hy wat op hierdie steen val, sal verpletter word; maar elkeen op wie hy val, dié sal hy vermorsel."

Jesus Christus, die Kneg van die Here

In die boek van Jesaja leer ons Jesus ken as 'n Kneg. Dit is 'n mondvul, maar ek wil graag die hele lot aanhaal:

Jesaja 49:1-11 - "Hoor na My, eilande, en luister, volke wat ver is! Die HERE het My geroep van die moederskoot af, van my geboorte af het Hy my naam genoem. En Hy het my mond gemaak soos 'n skerp swaard, in die skaduwee van sy hand het Hy My verberg; en Hy het My 'n skerp pyl gemaak, in sy pylkoker My weggesteek; en Hy het vir My gesê: Jy is my kneg, Israel, in wie Ek My verheerlik. Maar Ek het gesê: Tevergeefs het Ek My vermoei, my krag vir niks en vrugteloos verteer! Nogtans is my reg by die HERE, en my loon is by my God. En nou sê die HERE wat My van die moederskoot af geformeer het om sy Kneg te wees, om Jakob na Hom terug te bring en dat Israel by Hom versamel mag word—en Ek word geëer in die oë van die HERE, en my God is my sterkte— Hy het gesê: Dit is te gering dat U my Kneg sou wees om op te rig die stamme van Jakob en terug te bring die gespaardes in Israel: Ek het U gemaak tot 'n lig van die nasies, om my heil te wees tot aan die einde van die aarde. So sê die HERE, die Verlosser van Israel, sy Heilige, aan die diep veragte, aan Hom wat 'n afsku is by die volk, 'n Kneg van die heersers: Konings sal dit sien en opstaan, vorste, en hulle sal hul neerbuig ter wille van die HERE wat getrou is, van die Heilige van Israel wat U uitverkies het. So sê die HERE: In die tyd van die welbehag het Ek U verhoor, en in die dag van heil het Ek U gehelp; en Ek behoed U en gee U as 'n verbond van die volk, om die land weer op te rig, om verwoeste erfenisse te laat beërwe; om te sê aan die gevangenes: Gaan uit! aan hulle wat in duisternis is: Kom te voorskyn! By die paaie sal hulle wei, en op al die kaal heuwels sal hulle weiveld wees. Hulle sal geen honger en geen dors hê nie, en die woestyngloed en die son sal hulle nie steek nie; want hulle Ontfermer sal hulle lei en hulle saggies aanbring na die fontein van water. En Ek sal al my berge tot 'n weg maak, en my grootpaaie sal opgevul wees."

Jesaja 50:4-11 - "Die Here HERE het My 'n geoefende tong gegee, dat Ek kan weet om die vermoeide te verkwik met woorde; Hy wek elke môre, Hy wek my oor om te hoor soos die leerlinge. Die Here HERE het my oor geopen, en Ek was nie wederstrewig nie;

Ek het nie agteruitgewyk nie. Ek het my rug gegee vir die wat slaan, en my wange vir die wat die hare uitpluk; my aangesig het Ek nie verberg vir smaadhede en bespuwing nie. Maar die Here HERE help My; daarom kom Ek nie in die skande nie; daarom het Ek my aangesig gemaak soos 'n keisteen, en Ek weet dat Ek nie beskaamd sal staan nie. Hy is naby wat My reg verskaf. Wie wil met My 'n regsak begin? —laat ons saam optree! Wie is my teëparty? —laat hom nader kom na My toe! Kyk, die Here HERE help My: wie is dit wat My kan veroordeel? Kyk, hulle sal almal verslyt soos 'n kleet; die mot sal hulle eet. Wie is daar onder julle wat die HERE vrees, wat na die stem van sy Kneg luister, wat in duisternisse wandel en geen ligstraal sien nie? —laat hy vertrou op die Naam van die HERE en steun op sy God! Kyk, julle almal wat 'n vuur aansteek, wat julle met vuurpyle omgord—wandel in die vlam van julle vuur en onder die vuurpyle wat julle aangesteek het! Van my hand het dit julle oorgekom; in smart sal julle neerlê."

Jesaja 52:13-15 - "Kyk, my Kneg sal voorspoedig wees, Hy sal hoog en verhewe, ja, baie hoog word. Soos baie hulle oor U verstom het—so misvormd was sy voorkoms, geen mens meer nie, en sy gestalte was nie soos dié van 'n mensekind nie— so sal Hy baie nasies laat opspring, konings sal hulle mond oor Hom toehou; want wat aan hulle nie vertel is nie, sien hulle; en wat hulle nie gehoor het nie, word hulle gewaar."

Jesaja 53:1-12 - "Wie het geglo wat aan ons verkondig is? En aan wie is die arm van die HERE geopenbaar? Hy tog het soos 'n loot voor sy aangesig opgespruit en soos 'n wortel uit droë grond. Hy het geen gestalte of heerlijkheid gehad, dat ons Hom sou aansien nie, en geen voorkoms, dat ons Hom sou begeer nie. Hy was verag en deur die mense verlaat, 'n man van smarte en bekend met krankheid; ja, soos een vir wie 'n mens sy gelaat verberg; Hy was verag en ons het Hom nie geag nie. Nogtans het Hy óns krankhede op Hom geneem, en óns smarte—dié het Hy gedra; maar óns het Hom gehou vir een wat geplaag, deur God geslaan en verdruk was. Maar Hy is ter wille van ons oortredinge deurboor, ter wille van ons ongeregthede is Hy verbrysel; die straf wat vir ons die vrede aanbring, was op Hom, en deur sy wonde het daar vir ons genesing gekom. Ons almal het gedwaal soos skape, ons het elkeen sy eie pad geloop; maar die HERE het die ongeregthede van ons almal op Hom laat neerkom. Hy is mishandel, hoewel Hy onderworpe was, en Hy het sy mond nie oopgemaak nie; soos 'n lam wat na die slagplek gelei word en soos 'n skaap wat stom is voor sy skeerders—ja, Hy het sy mond nie oopgemaak nie. Uit die druk en uit die strafgerig is Hy weggeneem; en onder sy tydgenote—wie het daarvoor gedink dat Hy afgesny is uit die land van die lewendes? Ter wille van die oortreding van my volk was die plaag op Hom. En hulle het Hom sy graf by die goddelose gegee; en by 'n ryke was Hy in sy dood, omdat Hy geen onreg gedoen het nie en geen bedrog in sy mond gewees het nie. Maar dit het die HERE behaag om Hom te verbrysel; Hy het Hom krank gemaak; as sy siel 'n skuldoffer aangebied het, sal Hy 'n nakroos sien; Hy sal die dae verleng, en die welbehoe van die HERE sal deur sy hand voorspoedig wees. Weens die moeitelike lyde van sy siel sal Hy dit sien en versadig word; deur sy kennis sal my Kneg, die Regverdige, baie regverdig maak; en Hy sal hulle skuld dra. Daarom sal Ek Hom 'n deel gee onder die grotes, en met magtiges sal Hy buit verdeel; omdat Hy sy siel uitgestort het in die dood en saam met die oortreders getel was, terwyl Hy tog die sonde van baie gedra en vir die oortreders gebid het.

Laastens in Jeremia 10:19 sê die Here: "Wee my vanweë my verbreking! Smartlik is my wond! Ja, ék het gesê: Waarlik, dit is 'n lyding, en ek sal dit moet dra."

Jesus Christus, die Saad van die Vrou

Die heel eerste profesie oor Jesus word gevind in Genesis 3 nadat Adam en Eva gesondig het deur om van die verbode vrugte te eet. Die Here spreek toe die volgende uit oor die slang wat hulle verlei het: Genesis 3:15 - "En Ek sal vyandskap stel tussen jou en die vrou, en tussen jou saad en haar saad. Hy sal jou die kop vermorsel, en jy sal hom in die hakskeen byt."

Kom ons kyk dan na die verskeie profesieë wat gegee is oor Jesus:

Jesaja 7:14 - "Daarom sal die HERE self aan julle 'n teken gee: Kyk, die maagd sal swanger word en 'n seun baar en hom Immánuel noem."

Jesaja 9:5-6 - "Want 'n Kind is vir ons gebore, 'n Seun is aan ons gegee; en die heerskappy is op sy skouer, en Hy word genoem: Wonderbaar, Raadsman, Sterke God, Ewige Vader, Vredevors— tot vermeerdering van die heerskappy en tot vrede sonder einde, op die troon van Dawid en oor sy koninkryk, om dit te bevestig en dit te versterk deur reg en deur geregtigheid, van nou af tot in ewigheid. Die ywer van die HERE van die leërske sal dit doen."

In die Skrif word die profetiese versekering gegee dat Jesus uit Israel, Juda, Issai en David sou voortkom.

Numeri 24:17 - "Ek sien hom, maar nie nou nie, ek aanskou hom, maar nie naby nie: 'n ster kom te voorskyn uit Jakob, en 'n septer kom uit Israel..."

Genesis 49:8-12 - "Juda, jy is dit! Jou sal jou broers loof. Jou hand sal op die nek van jou vyande wees; voor jou sal die seuns van jou vader hulle neerbuig. Juda is 'n jong leeu; van die roof af het jy opgeklim, my seun. Hy buig hom, hy gaan lê soos 'n leeu en soos 'n leeuin; wie sal hom opjaag? Die septer sal van Juda nie wyk nie, nóg die veldheerstaf tussen sy voete uit totdat Silo kom; en aan Hom sal die volke gehoorsaam wees. Hy maak sy jong esel vas aan die wingerdstok en die vul van sy eselin aan die edelste wynstok; Hy was sy kleed in wyn en sy gewaad in druiwebloed. Hy is donkerder van oë as wyn en witter van tande as melk."

Jesaja 65:9 - "En Ek sal 'n nakroos uit Jakob laat voortkom en uit Juda die erfbesitter van my berge; en my uitverkorenes sal dit erflik in besit neem en my knegte daar woon."

Jesaja 11:1-10 - "Maar daar sal 'n takkie uitspruit uit die stomp van Isai, en 'n loot uit sy wortels sal vrugte dra; en op Hom sal die Gees van die HERE rus, die Gees van wysheid en verstand, die Gees van raad en sterkte, die Gees van kennis en van die vrees van die HERE. En Hy het 'n welgevalle aan die vrees van die HERE; en Hy sal

nie regsprek na wat sy oë sien nie, en nie oordeel na wat sy ore hoor nie; maar aan die armes sal Hy in geregtigheid reg doen en die sagmoediges van die land met billikheid oordeel; maar Hy sal die aarde slaan met die roede van sy mond en met die asem van sy lippe die goddelose doodmaak. En geregtigheid sal die gordel van sy lendene en trou die gordel van sy heupe wees. Dan wei die wolf by die lam, en die luiperd gaan lê by die bokkie, en die kalf en die jong leeu en die vetgemaakte vee bymekaar, en 'n klein seuntjie sal hulle aanja. Die koei en die berin wei, en hulle kleintjies lê bymekaar; en die leeu eet strooi soos die os; en die suigling speel by die gat van 'n adder, en die gespeende kind steek sy hand uit na die kuil van 'n basilisk. Hulle sal geen kwaad doen of verderf aanrig op my hele heilige berg nie; want die aarde sal vol wees van die kennis van die HERE soos die waters die seabodem oordek. En in dié dag sal die nasies vra na die wortel van Isai, wat daar staan as 'n banier van die volke, en sy rusplek sal heerlik wees.

Psalms 132:17-18 - "Die HERE het aan Dawid gesweer in waarheid (Hy sal daarvan nie terugkom nie): Van die vrug van jou liggaam sal Ek laat sit op jou troon."

Psalms 132:17-18 - "Daar sal Ek vir Dawid 'n horing laat uitspruit; Ek het vir my gesalfde 'n lamp toeberei. Ek sal sy vyande met skaamte beklee, maar op hom sal sy kroon skitter.

Jesaja 16:5 - "En opgerig is deur goedgunstigheids 'n troon, en daarop sit een in getrouheid in Dawid se tent, 'n regter wat die reg soek en gou is in geregtigheid."

Jeremia 23:5-6 - "Kyk, daar kom dae, spreek die HERE, dat Ek vir Dawid 'n regverdige Spruit sal verwek, en as Koning sal Hy regeer en verstandig handel en reg en geregtigheid doen in die land. In sy dae sal Juda verlos word en Israel veilig woon; en dit is sy naam waarmee Hy genoem sal word: DIE HERE ONS GEREJTIGHEID."

Jesaja 4:2 - "In dié dag sal die Spruit van die HERE wees tot sieraad en heerlikheid, en die vrug van die land tot hoogheid en versiering vir die vrygeraaktes van Israel."

Jeremia 33:15-16 - "In dié dae en in dié tyd sal Ek vir Dawid 'n Spruit van geregtigheid laat uitspruit, en Hy sal reg en geregtigheid doen in die land. In dié dae sal Juda verlos word en Jerusalem veilig woon; en dit sal die naam daarvan wees: DIE HERE ONS GEREJTIGHEID."

Jesaja 32:1 - "Kyk, 'n koning sal regeer in geregtigheid, en die vorste sal heers volgens reg."

Jesaja 40:10-11 - "Kyk, die Here HERE sal kom as 'n Sterke, en sy arm sal heers; kyk, sy loon is by Hom, en sy beloning is voor sy aangesig. Hy sal sy kudde laat wei soos 'n herder; Hy sal die lammers in sy arm vergader en aan sy bors dra; die lammerooie sal Hy saggies lei."

Ons kan nou duidelik sien dat twee van die hoofeienskappe van Jesus is dat Hy optree

as 'n Kneg en 'n Heerser. Hierdie saak veroorsaak baie verdeling onder die Jode en verskeie groepe het gekom by die slotsom dat daar twee Messiasse gaan wees. Een kom as die 'Suffering Servant' van Jesaja 53, terwyl die ander kom as die groot Koning van Jesaja 9. Maar die uitleg is duidelik: Met Jesus se eerste koms kom Hy om te dien as kneg, die Lam. Die tweede keer kom Hy om te heers as koning, die Leeu.

Jesus Christus, die Profeet uit jou midde

Moses spreek tot Israel in Deuteronomium 18:15-19 en sê: "'n Profeet uit jou midde, uit jou broers, soos ek is, sal die HERE jou God vir jou verwek; na Hom moet julle luister—net soos jy van die HERE jou God by Horeb gevra het toe jy op die dag van die vergadering gesê het: Ek kan die stem van die HERE my God nie langer hoor en hierdie groot vuur nie meer sien nie, anders sterf ek. Toe het die HERE vir my gesê: Dit is goed wat hulle gespreek het. 'n Profeet sal Ek vir hulle verwek uit die midde van hulle broers, soos jy is, en Ek sal my woorde in sy mond lê, en Hy sal aan hulle sê alles wat Ek Hom beveel. En die man wat nie luister na my woorde wat Hy in my Naam spreek nie, van hom sal Ek self rekenskap afeis."

Jesus Christus, die Priester volgens die orde van Melgisédek

Psalms 110:4 - "Die HERE het gesweer, en dit sal Hom nie berou nie: U is priester vir ewig volgens die orde van Melgisédek."

Die eerste verhaal van Melgisédek word gevind in Genesis 14:18-20 - "En Melgisédek, die koning van Salem, wat 'n priester van God, die Allerhoogste, was, het brood en wyn gebring en hom geseën en gesê: Geseënd is Abram deur God, die Allerhoogste, die Skepper van hemel en aarde. En geseënd is God, die Allerhoogste, wat u vyande in u hand gegee het. Toe gee hy hom die tiende van alles."

Wanneer ons hierdie woorde lees saam met die volgende, dan verstaan ons dat Melgisédek 'n teëbeeld is van Christus wat brood en wyn kom aanbied het:

Hebreërs 7:1-3 - "Want hierdie Melgisédek was koning van Salem, priester van God, die Allerhoogste, wat vir Abraham tegemoetgegaan het by sy terugkeer toe hy die konings verslaan het, en hom geseën het; aan wie Abraham ook 'n tiende deel van alles gegee het—hy was in die eerste plek, volgens uitleg, koning van die geregtigheid en dan ook koning van Salem, dit is koning van vrede; sonder vader, sonder moeder, sonder geslagsregister, sonder begin van dae of lewenseinde, maar gelykgestel aan die Seun van God, bly hy priester altyddeur.

Hebreërs 6:20 - "waar Jesus as voorloper vir ons ingegaan het, Hy wat volgens die orde van Melgisédek 'n hoëpriester geword het vir ewig."

In Lukas 22:19-20 bring Christus die nuwe verbond tot stand waarvan eerste geprofeteer was in Jeremia 31:31-33 - "Kyk, daar kom dae, spreek die HERE, dat Ek met die huis van Israel en die huis van Juda 'n nuwe verbond sal sluit; nie soos die

verbond wat Ek met hulle vaders gesluit het op dié dag toe Ek hulle hand gegryp het om hulle uit Egipteland uit te lei nie—my verbond wat hulle verbreek het, alhoewel Ek gebieders oor hulle was, spreek die HERE. Maar dit is die verbond wat Ek ná dié dae met die huis van Israel sal sluit, spreek die HERE: Ek gee my wet in hulle binneste en skrywe dit op hulle hart; en Ek sal vir hulle 'n God wees, en hulle sal vir My 'n volk wees"

Ek wil graag uitwys dat die woord hier vir nuut "chadash" is, 'n woord wat nie verband hou met hernuwe of vernuwe nie. Die Here gebruik byvoorbeeld weer "chadash" wanneer Hy sê Hy gaan 'n nuwe hemel en 'n nuwe aarde maak -Jesaja 66:22. In Hebreërs 8:13 wys Paulus dan uit: "As Hy sê 'n nuwe verbond, het Hy die eerste oud gemaak; en wat oud word en verouder, is naby die verdwyning." Die Griekse woord hier gebruik vir nuut is "Kaheenos", 'n woord wat ook nie op hernuwe of vernuwe dui nie, maar op vars. (Strong's)

Met 'n nuwe verbond dan, kom daar 'n nuwe priesterskap wat die priesterskap van Melgisédek is, en dus nie die priesterskap van Aäron wat deur die wet van Moses vereis word nie. Dan lees ons in Hebreërs 7:12 - "Want met verandering van die priesterskap kom daar noodsaaklik ook verandering van wet..."

'n Nuwe verbond met 'n nuwe priesterskap, asook 'n nuwe wet. Hierdie wet word die wet van Christus genoem -1 Korintiërs 9:21, Galasiërs 6:2. Jakobus 1:5 noem dit die "volmaakte wet van vryheid" terwyl Romeine 8:2 dit die "wet van die Gees van die lewe in Christus Jesus" noem. "Want dit is volkome duidelik dat onse Here uit Juda voortgespruit het, en met betrekking tot hierdie stam het Moses niks gesê van die priesterskap nie." -Hebreërs 7:14.

Daar is 'n streng waarskuwing vir diegene wat eintlik deel het aan die nuwe verbond, maar wat dan terug wil gaan na die ou verbond toe, na die wet van Moses: "Kyk, ek, Paulus, sê vir julle dat as julle jul laat besny, Christus vir julle tot geen nut sal wees nie. En ek betuig dit weer aan elke mens wat hom laat besny, dat hy onder verpligting is om die hele wet te onderhou. Julle wat geregverdig wil wees deur die wet, is losgemaak van Christus; julle het van die genade verval." -Galasiërs 5:2-4.

Die wet begin in Eksodus en strek tot in Deuteronomium vir 'n totaal van 613 wette! Dit is die ontbinding van die wet waarvan Jesus gepraat het in Mattheus 5:17, wanneer 'n persoon kom en sê hy wil byvoorbeeld net die tien geboie hou maar hom nie wil laat besny nie. Jakobus 2:10 sê "Want wie die hele wet onderhou, maar in een opsig struikel, het aan almal skuldig geword." As enige iemand dus die wet van Moses wil onderhou, moet *elke* wet stiptelik onderhou word en vervloek is die mens wat nie *elke* woord van die wet dan onderhou nie -Deuteronomium 27:26.

Romeine 8:2 - "Want die wet van die Gees van die lewe in Christus Jesus het my vrygemaak van die wet van die sonde en die dood."

Jesus Christus, die Ware Wynstok

Johannes 15:1-2 - "Ek is die ware wynstok, en my Vader is die landbouer. Elke loot wat in My nie vrug dra nie, neem Hy weg; en elke loot wat vrug dra, dié maak Hy skoon, sodat dit meer vrug kan dra."

In hierdie nuwe verbond, wat ons nuwe wyn moet bedien -Mattheus 9:17- moet ons in Jesus bly, anders kan ons geen vrug dra nie.

Jesaja 5:1-2 - "Laat my tog sing van my Beminde; 'n lied van my Beminde oor sy wingerd! My Beminde het 'n wingerd op 'n vrugbare heuwel. En Hy het dit omgespit en die klippe daar uitgehaal en dit beplant met edel wingerdstokke; en Hy het 'n toring daar binne-in gebou en ook 'n parskuip daarin uitgekap; en Hy het verwag dat dit druiwe sou dra, maar dit het wilde druiwe voortgebring.

Jeremia 12:10 - "Baie herders het my wingerd verniel, hulle het my stuk land vertrap, hulle het my begeerlike stuk land 'n woeste wildernis gemaak..."

Die waarskuwing hier is dat indien ons nie in Christus bly en die wet van Christus vervul nie wat hoofsaaklik liefde is -Romeine 13:10- en gehoorsaamheid -Johannes 14:15- bedien ons ou wyn, bring ons wilde druiwe voort en vertrap ons sy "begeerlike stuk land".

Die Trotsheid van die See

Psalms 89:10 - "U heers oor die trotsheid van die see; as sy golwe hulle verhef, bring U hulle tot bedaring."

In twee gebeurtenisse openbaar Jesus sy krag oor die see:

In Lukas 8:24 gaan Jesus "en bestraf die wind en die watergolwe, en hulle het bedaar en daar het 'n stilte gekom."

Markus 6:48 vertel ons: "En omtrent die vierde nagwaak het Hy na hulle gekom, al wandelende op die see."

In die lig van die volgende verse is hierdie twee gebeurtenisse van groot belang:

Psalms 107:25-30 - "Want Hy het gesprek en 'n stormwind laat opsteek wat die golwe daarvan opgesweep het. Hulle het opgerys na die hemel, neergedaal na die dieptes— hulle siel het vergaan van wee. Hulle het getuimel en gewaggel soos 'n dronk man, en al hulle wysheid is verwar. Toe het hulle die HERE aangeroep in hul benoudheid, en uit hul angste het Hy hulle uitgelei. Hy het die storm 'n gesuis gemaak, en hulle golwe het stil geword. Toe was hulle bly, omdat dit rustig geword het, en Hy het hulle gelei na die hawe van hul begeerte.

Dit is skrikwekkend hoe akkuraat hierdie teks die gebeurtenis in Lukas 8 beskryf.

Psalms 65:6-9 - "Vreeslike dinge antwoord U ons in geregtigheid, o God van ons heil,

vertroue van al die eindes van die aarde en van die verste see! Wat die berge grondves deur u krag, wat omgord is met mag, wat die gebruik van die see stilmaak, die gebruik van hulle golwe en die rumoer van die volke; sodat die bewoners van die eindes vrees vir u tekens; U laat die uitgange van die môre en die aand jubel."

Job 9:8 - "wat alleen die hemel uitspan en stap op die golwe van die see;"

Psalms 77:20 - "U weg was in die see en u paaie in groot waters, en u spore was nie te beken nie."

Psalms 2

"Waarom woel die nasies en bedink die volke nietige dinge? Die konings van die aarde staan gereed, en die vorste hou saam raad teen die HERE en teen sy Gesalfde en sê: Laat ons hulle bande stukkend ruk en hulle toue van ons afwerp! Hy wat in die hemel woon, lag; die Here spot met hulle. Dan sal Hy hulle aanspreek in sy toorn, en in sy grimmigheid sal Hy hulle verskrik: Ek tog het my Koning gesalf oor Sion, my heilige berg. Ek wil vertel van die besluit: Die HERE het aan My gesê: U is my Seun, vandag het Ek self U gegeneer. Eis van My, en Ek wil nasies gee as u erfdeel en die eindes van die aarde as u besitting. U sal hulle verpletter met 'n ysterstaf, U sal hulle stukkend slaan soos 'n erdepot. Wees dan nou verstandig, o konings; laat julle waarsku, o regters van die aarde! Dien die HERE met vrees, en juig met bewing. Kus die Seun, dat Hy nie toornig word en julle op die weg vergaan nie; want gou kan sy toorn ontvlam. Welgeluksalig is almal wat by Hom skuil!"

Psalms 22

"My God, my God, waarom het U my verlaat, ver van my hulp, van die woorde van my gebrul? My God, ek roep bedags, maar U antwoord nie; en snags, en ek kan nie swyg nie. Tog is U die Heilige wat woon onder die lofsange van Israel! Op U het ons vaders vertrou; hulle het vertrou, en U het hulle uitgered. Hulle het U aangeroop en het ontvlug; op U het hulle vertrou en nie beskaamd gestaan nie. Maar ek is 'n wurm en geen man nie, 'n smaad van die mense en verag deur die volk. Almal wat my sien, spot met my; hulle steek die lip uit, hulle skud die hoof en sê: Laat dit aan die HERE oor! Laat Hy hom red, laat Hy hom bevry: Hy het mos behae in hom! Ja, U is dit wat my uit die moederskoot uitgetrek het, wat my veilig laat rus het aan my moeder se bors. Aan U is ek oorgegee van die geboorte af; van die skoot van my moeder af is U my God. Wees nie ver van my af nie, want die nood is naby, want daar is geen helper nie. Baie stiere het my omsingel, sterkes van Basan het my omring. Hulle het hul mond teen my oopgespalk soos 'n leeu wat verskeur en brul. Ek is uitgestort soos water; al my beendere raak los; my hart het soos was geword; dit het gesmelt binne-in my ingewande. My krag is verdroog soos 'n potskerf, en my tong kleef aan my verhemelte; en U lê my neer in die stof van die dood. Want honde het my omsingel; 'n bende kwaaddoeners het my omring; hulle het my hande en my voete deurgrawe. Al my beendere kan ek tel; hulle kyk, hulle sien met welgevalle op my neer! Hulle verdeel my klere onder mekaar en werp die lot oor my gewaad. Maar U, HERE, wees nie ver nie; my Sterkte, maak tog gou om my te help! Red my siel van die swaard, my enigste uit

die mag van die hond. Verlos my uit die bek van die leeu, en uit die horings van die buffels het U my verhoor! Ek wil u Naam aan my broers vertel, in die vergadering U prys. Julle wat die HERE vrees, prys Hom! Al die nakomelinge van Jakob, vereer Hom! Ja, vrees Hom, al die nakomelinge van Israel! Want Hy het die ellende van die ellendige nie verag of verfoei en sy aangesig vir hom nie verberg nie; maar Hy het gehoor toe dié Hom aangeroep het om hulp. Van U kom my lof in 'n groot vergadering; ek sal my geloftes betaal in teenwoordigheid van die wat Hom vrees. Die ootmoediges sal eet en versadig word; hulle sal die HERE prys wat na Hom soek; mag julle hart vir ewig lewe! Al die eindes van die aarde sal daaraan dink en hulle tot die HERE bekeer, en al die geslagte van die nasies sal voor u aangesig aanbid. Want die koninkryk behoort aan die HERE, en Hy heers oor die nasies. Al die grotes van die aarde sal eet en aanbid; almal wat in die stof neerdaal, sal voor sy aangesig kniel en hy wat sy siel nie in die lewe kan hou nie. 'n Nageslag sal Hom dien; dit sal vertel word van die HERE aan die volgende geslag. Hulle sal aankom en sy geregtigheid verkondig aan die volk wat gebore word; want Hy het dit gedoen."

Psalms 110

"Die HERE het tot my Here gespreek: Sit aan my regterhand, totdat Ek u vyande maak 'n voetbank vir u voete. U magtige septer sal die HERE uitstrek uit Sion en sê: Heers te midde van u vyande. U volk sal baie gewillig wees op die dag van u krygsmag; in heilige feesgewade, uit die moederskoot van die dageraad sal vir U wees die dou van u jong manskappe. Die HERE het gesweer, en dit sal Hom nie berou nie: U is priester vir ewig volgens die orde van Melgisédek. Die Here aan u regterhand verbrysel konings op die dag van sy toorn. Hy sal 'n strafgerig hou onder die nasies; Hy maak dit vol dooie liggame; Hy verbrysel 'n hoof oor 'n groot land. Uit die stroom sal Hy drink op die pad; daarom sal Hy die hoof ophef."

Die Koninkryk van Jesus Christus

Daniël 7:13-14 - "Ek het gesien in die naggestigte, en kyk, met die wolke van die hemel het Een gekom soos die Seun van 'n mens, en Hy het gekom tot by die Oue van dae, en hulle het Hom nader gebring voor Hom. En aan Hom is gegee heerskappy en eer en koningskap; en al die volke en nasies en tale het Hom vereer; sy heerskappy is 'n ewige heerskappy wat nie sal vergaan nie, en sy koninkryk een wat nie vernietig sal word nie."

*How great is our God
Sing with me how great is our God
All will see how great
How great is our God*

